

საქართველოს კანონი

„თამბაქოს კონტროლის შესახებ“ საქართველოს კანონში ცვლილების შეტანის თაობაზე”

მუხლი 1. “თამბაქოს კონტროლის შესახებ” საქართველოს კანონში (საქართველოს საკანონმდებლო მაცნე, 76, 29.12.2010, მუხ.500) შეტანილ იქნეს შემდეგი ცვლილება:

1. მე-5 მუხლის მე-2 პუნქტის “გ” ქვეპუნქტი ჩამოყალიბდეს შემდეგი რედაქციით:

“გ) სავაჭრო ობიექტში, თუ თამბაქოს ნაწარმი, თამბაქოს აქსესუარი ან/და თამბაქოს მოხმარებისათვის განკუთვნილი მოწყობილობა განლაგებულია სურსათთან ან სხვა სახის პროდუქტთან ერთად. ამასთანავე, სავაჭრო ობიექტში თამბაქოს ნაწარმი, თამბაქოს აქსესუარი ან/და თამბაქოს მოხმარებისათვის განკუთვნილი მოწყობილობა განლაგებული უნდა იქნეს სურსათისგან და სხვა სახის პროდუქტისგან განცალკევებით;”.

2. მე-6 მუხლს დაემატოს შემდეგი შინაარსის:

ა) 5¹ პუნქტი:

“5¹. თამბაქოს ნაწარმის მწარმოებელი ან/და იმპორტიორი ვალდებულია შესაბამის უფლებამოსილ ორგანოს ყოველი კალენდარული წლის დასაწყისში წარუდგინოს ინფორმაცია გასული კალენდარული წლის განმავლობაში თამბაქოს ნაწარმის რა რაოდენობაზე და რომელ პარტიაზე რა სახის (ძირითადი და დამატებითი) და რომელი ნიმუშის სამედიცინო გაფრთხილებების როტაცია განახორციელა.”;

ბ) 6¹ პუნქტი:

“6¹. იმ თამბაქოს ნაწარმის შეფუთვაზე, რომელიც განკუთვნილია სასაზღვრო კონტროლის ზონაში არსებულ თავისუფალი ვაჭრობის პუნქტში რეალიზაციისათვის ან/და განლაგებისათვის, სამედიცინო გაფრთხილება შესაძლებელია განთავსდეს ინგლისურ ენაზეც.”.

3. მე-10 მუხლის:

ა) პირველი პუნქტის “გ” და “დ” ქვეპუნქტები ჩამოყალიბდეს შემდეგი რედაქციით:

“გ) საგანმანათლებლო (ზოგადსაგანმანათლებლო, უმაღლესი საგანმანათლებლო, პროფესიული საგანმანათლებლო), საადმინისტრაციო და საგანმანათლებლო-საადმინისტრაციო დაწესებულებების, სხვა სასწავლო დაწესებულებების, ბიბლიოთეკების, მოსწავლე ახალგაზრდობის ბანაკების, ბავშვთა გასართობი ცენტრების და 18 წლამდე ასაკის პირებისათვის განკუთვნილი სხვა დაწესებულებების შენობა-ნაგებობებში და მათ საკუთრებაში არსებულ ტერიტორიებზე, გარდა ამ მუხლის 1⁵ პუნქტით გათვალისწინებული შემთხვევისა, აგრეთვე 18 წლამდე ასაკის პირებისათვის განკუთვნილ საზოგადოებრივ შეკრებებზე;

დ) სამედიცინო და ფარმაცევტული დაწესებულებების შენობა-ნაგებობებში და ამ დაწესებულებების ტერიტორიებზე, გარდა ამ მუხლის 1² პუნქტით გათვალისწინებული დაწესებულებებისა და ამავე მუხლის 1⁵ პუნქტით გათვალისწინებული შემთხვევისა;”;

ბ) 1¹ პუნქტს დაემატოს შემდეგი შინაარსის:

ბ.ა) “ე¹” ქვეპუნქტი:

“ე¹) სათამაშო აპარატების სალონში, რომლის მოწყობის ნებართვისათვის დადგენილია სანებართვო მოსაკრებლის განაკვეთი არანაკლებ 200 000 ლარის ოდენობით”;

ბ.ბ) “ი” ქვეპუნქტი:

“ი) პროფესიული თეატრის მუდმივი სარგებლობისათვის განკუთვნილ შენობა-ნაგებობაში მხოლოდ მსახიობის ან/და შემსრულებლის მიერ სპექტაკლის ან/და თეატრალური წარმოდგენის მიმდინარეობის დროს, რეჟისორის შემოქმედებითი ჩანაფიქრის განხორციელების მიზნით. ამასთანავე, სპექტაკლის ან/და თეატრალური წარმოდგენის დაწყების წინ მაყურებელს უნდა მიეწოდოს ინფორმაცია თამბაქოს ნაწარმის მავნე ზემოქმედების შესახებ.”;

გ) 1⁴ პუნქტის შემდეგ დაემატოს შემდეგი შინაარსის 1⁵ პუნქტი:

“1⁵. უმაღლესი საგანმანათლებლო, პროფესიული საგანმანათლებლო, სამედიცინო და ფარმაცევტული დაწესებულებების ტერიტორიებზე თამბაქოს მოწვევა დასაშვებია აღნიშნული დაწესებულების ხელმძღვანელის მიერ სპეციალურად განსაზღვრულ ადგილას (ადგილებში). ასეთი ადგილების რაოდენობა დაწესებულების ტერიტორიაზე არ უნდა აღემატებოდეს სამს, ხოლო თითოეული ადგილის ფართობი არ უნდა იყოს 20 კვადრატულ მეტრზე მეტი.”

დ) მე-7 პუნქტი ჩამოყალიბდეს შემდეგი რედაქციით:

“7. აკრძალულია თამბაქოს მოწვევის ან მისი მოხმარების სხვა ფორმების დემონსტრირება მასობრივი ინფორმაციის საშუალებით, სხვა ბეჭდური ან ელექტრონული საშუალებით, თეატრალური წარმოდგენის მეშვეობით (გარდა ამ მუხლის 1¹ პუნქტის “ი” ქვეპუნქტით გათვალისწინებული შემთხვევისა), მასობრივი ჩვენების მეშვეობით, გარდა ღია სივრცეში პირდაპირი ეთერის მიმდინარეობისას კადრში მწვევლის შემთხვევევითი მოხვედრისა.”;

ე) მე-8 პუნქტის “ზ” ქვეპუნქტი ჩამოყალიბდეს შემდეგი რედაქციით:

“ზ) არ დაუშვას ამ მუხლის პირველი პუნქტით განსაზღვრულ იმ შენობა-ნაგებობაში ან/და ტერიტორიაზე, სადაც ის საქმიანობას ეწევა, თამბაქოს მოხმარების შედეგად არსებული კვამლის, ფერფლის, ნამწვის არსებობა, აგრეთვე ჩილიმის და საფერფლეს განთავსება.”.

4. 10¹ მუხლის პირველი პუნქტი ჩამოყალიბდეს შემდეგი რედაქციით:

“1. სიგარაბარის მოწყობის ნებართვის გაცემას, გაუქმებას, მასში ცვლილების შეტანას, უწყებრივ სანებართვო რეესტრში გატარებას და ამ ნებართვასთან დაკავშირებულ სხვა ღონისძიებებს “ლიცენზიებისა და ნებართვების შესახებ” საქართველოს კანონის და ამ კანონის შესაბამისად ახორციელებს საქართველოს ფინანსთა სამინისტროს მმართველობის სფეროში შემავალი საჯარო სამართლის იურიდიული პირი - შემოსავლების სამსახური (შემდგომ - შემოსავლების სამსახური)”.

5. 10² მუხლის მე-5 პუნქტი ჩამოყალიბდეს შემდეგი რედაქციით:

“5. ამ მუხლით გათვალისწინებული სამართალდარღვევის ოქმის შედგენის და საქმის განხილვის უფლება აქვს შემოსავლების სამსახურის საამისოდ უფლებამოსილ პირს.”.

მუხლი 2. ეს კანონი ამოქმედდეს გამოქვეყნებისთანავე.

საქართველოს პრეზიდენტი

გიორგი მარგველაშვილი

ქუთაისი,
2018 წლის